

吳中舊事



吳中山水清嘉衣冠所聚今其子孫往來淪落而無
聞其遺風餘俗邈不可考故因暇日叅記舊聞凡一
百餘事庶資郡乘之萬一云爾

李育字仲蒙吳人馮當世榜第四人登第能為詩性
高簡故官不甚顯亦少知之者與外大父晁公善尤
愛其詩先君嘗得其親書飛騎橋一篇於晁公字畫
亦清麗以為珍玩詩云魏人野戰如鷹揚吳人水戰
如龍驤氣吞魏王唯吳王建旗敢到新城傍霸王心

當萬夫敵麾下倉皇無羽戢塗窮事變接短兵生死
之間不容息馬奔津橋、半徹洶、有聲如地裂蛟
怒橫飛秋水空鴻驚徑度秋雲缺奮迅金羈汗沾臆
濟主艱難天借力艱難始是報主時平日主君須愛
惜

蔣侍郎堂家藏楊文公與王魏公一帖用半幅紙有
折痕記其略云昨夜有進士蔣堂携所作文來極可
喜不敢不布聞謹封拜呈後有蘇子瞻跋云夜得一
士旦而告人察其情若喜而不寐者蔣不知何從得

之在其孫彛處

程光祿師孟吳下人樂易純質喜為詩效白樂天而
尤簡直至老不改吳語與王荆公有塲屋之舊荆公
頗喜之晚相遇猶如布衣時自江州致仕歸適荆公
蔣山留數日時已年七十餘荆公戲之曰公尚欲仕
乎曰猶可更作一郡荆公大笑知其無隱情也

蘇子美云吳中渚茶野醞足以消憂尊鱸稻蟹足以
適口又多高僧隱君子佛廟勝絕家有園林珎花奇
石曲池高臺魚鳥留連不覺日暮遂終此不去焉

諸珣字潛叔隱君子也鄉人罕識之章丞相程光祿
尤與之厚善

林德祖處云余家自伯父皇考洎諸父奉王大母來
居於蘇著籍此州者五十年矣今帶城橋儒學坊為
吾家舊榜也橫山之寶華山之博士塢吾家三世
之所葬也寶華山有智顯寺宋紹聖四年知樞密院
事林希請為功德寺遂加慈嚴之額林氏墳在寺後
穹窿寺有米元章草書壁高宗嘗欲取去有狀免不
曾移徙

林樞密家在寶華山下故書手澤多為人所借余家
藏其手書左傳訓練二帙末有題字云姑蘇林子中
借錄于家藏

辛卯仲秋中瀚歲大水霖雨不止

紹興中有於古塚得故外黃令高君碑隸書殘缺乃
東漢高彪漢書傳云彪吳郡無錫人後遷內黃令帝
勅同寮臨送祖于上東門彰到官有德政上書薦縣
人申屠蟠等病卒于官史以外黃為內黃誤矣當以
墓碑為正 槁簡贅筆

隸釋云紹興中吳郡取土於郭外得之今碑在郡齋中

章伯深潤言吳中風俗上元夜饒鼓歌吹諠街市謂之旱划船

龍溪曾旼彥和會稽賀鑄方回二家書最多其子獻之朝各命以官皆經彥和方回手按二家並居郡中今西山羊腸嶺有彥和之父墓碑

范文正公長子監簿純祐自幼穎悟明敏過人公所料事必先知之善能出神公在西邊凡虜情機事皆

預遙知蓋出神至虜廷知之故公每制勝料敵如神者監簿之力也一日因出神為人所驚自此神觀不足未幾而亡時甚少也張士賢聞之公之族子閻彥和云

平江自朱勔用事花木之奇異者盡移供禁籞下至墟墓間珎木亦遭發鑿山林所餘惟合抱成圍或擁腫樸散者乃得保天年建炎己酉冬泉庚戌春宣撫使周望留姑蘇諸將之兵斧斤日往樵斫俱盡棟梁之材折而為薪莫敢誰何諸山皆童矣亦草木一時

之厄耶

宣和間朱勔應奉進為節度使子汝賢慶陽軍承宣使汝功靜江軍承宣使汝文閣門宣贊舍人弟勣閣門宣贊舍人汝玳朝奉大夫直龍圖閣汝舟明州觀察使汝明榮州刺史孫絺繹約緇緝綬並閣門宣贊舍人綽紳並閣門祇候一時軒裳之盛未之有也靖康初籍其家悉追奪竄嶺表

宣和癸卯春勔采石太湖鼇山得一石長四丈有奇廣得其半璣瓏嵌空竅穴千百非雕刻所能成也并

郡宅後池光亭臺上白公檜世傳白樂天手植也創造二大舟費八千緡以獻時常潤間河渠淺淤重載不前乃先繪圖以聞宸翰賜石名神運昭功敷慶萬年之峯是秋方至京師詔置于艮嶽

建炎庚戌二月二十五日虜兵陷平江府兩浙宣撫使周望移軍退保崑山縣泊舟馬鞍山下湖邊吏方用印忽有風旋轉入舟印與文移盡卷入水相視駭愕使水工探之不獲望懼北兵之來襲也欲亟走屯通惠鎮為失印所撓留吏求之吏禱于馬鞍山神曰

靜濟侯者曰苟不獲且將得罪必赫廟而行縣宰亦
懼乃作堰捍水以蹋車涸之畚插如雲鑿數尺始得
之已淪於泥中矣 墨庄冗錄

新唐書載張籍和州烏江人而張洎作張司業詩序
云籍蘇州吳郡人二者無可考證今烏江縣有張司
業宅則疑傳載為是予因以詩集攷之有贈陸暢詩
云共蹋長安街裡塵吳州獨作未歸身胥門舊宅今
誰在君過西塘與問人由是可知其為吳人無疑矣
抑亦嘗寓烏江云考韓文公文亦曰吳郡張籍

府署之南名吳會坊 黃外反按後漢蔡邕傳亡命江
海遠跡吳會 音與會計之會同注引會稽高遷亭竹

椽為笛事又諸葛孔明說荊州形勢曰東連吳會王
羲之為會稽內史時朝廷賦役繁重吳會尤甚石崇
論伐吳之功曰吳會僭逆指言孫氏則吳會當是吳
郡與會稽猶言吳越也蓋不獨謂姑蘇今坊名吳會
未知何據而然前漢吳王濞傳上患吳會輕悍即吳
會也

吳人多謂書人為歎子唐韻云歎小大癡不解事者

慶歷間安定胡先生在吳學蘇子美被誣退居滄浪
亭太常博士陳寔卿壯歲致仕而歸吳中稱三賢人
胡先生以教虞卿以行子美以文名動天下
程若筠吳中道士善畫嘗召至京師

秀峰寺西二十里至三洋有福林寺、門石幢刻唐
咸通年又云上當慶忌尼寺蓋寺舊名云字亦湯滅
吳農忌五月甲申乙酉雨、則大水諺云甲申猶且
可乙酉怕殺我

范至能有會散夜步詩云忘却下樓扶我誰接籬顛

倒酒霑衣貪看雪樣滿街月不上籃輿步砌歸步砌
吳人語也

雕簷綺戶倚晴空如畫曾是吳王舊臺榭自浣紗人
去後落日平蕪行雲斲幾見花開花謝淒涼闌干外
一簇江山多少圖王共爭霸 莫閑愁金杯潑灑對
酒當歌懽娛地夢中興亡休話漸倚遍西風晚潮生
明月裏鷺鷥背人飛下余每登姑蘇臺讀潘庭堅柱
間洞僊歌輒裴回不忍去元統三年冬郡守濟南張
侯新脩此臺易去舊柱遂不復存庭堅淳祐中嘗為

澗西茶鹽司幕幹官

鄧道樞字應叔綿州人端平甲午隨魏文靖公舟下瞿塘峽越五年抵吳

僧妙應者俗姓童鄉人呼為童和尚妙于刻石居隆興寺嘗摸廬山王翰湏菩提像刻寺中其碑陰作天台五百尊者筆法竒古又於虎丘作石觀音像亦佳淳熙中人

五柳堂者胡公稷所作也其宅乃陸魯望故址所謂臨頓里是也

楊懿儒字彞父其先浦城人與方子通同時號吳中二老子友夔字彞韶有文行許彥周云彞韶長僕十餘歲向同在姑蘇時盜發孫堅墓楊作詩云闔閭城南荒古丘昔誰葬者孫豫州久無行客為下馬時有牧童來放牛嗚呼彞韶今亡矣他詩皆工必可傳世也

孫實字若虛郡人少負俊聲特好滑稽談笑有味壯游鄉校同舍生多出田里富豪以孫之貧不甚加禮而一牛姓者尤所侮玩因作牛秀才賦嘲之中有云

腰帶頭垂尚有田單之火爍頭脚上猶聞甯戚之歌
賦成聞者絕倒是時樂圃先生朱長文為州學教授
命其父訓飭之遂發憤適京師入太學登第而歸仕
至朝奉大夫知光州卒

丁晉公自光州歸葬華山所居在大郎橋堂宇甚古
有層閣數間臨其後諸孫德隅善篆亦工於四六

鄭宣徽戩字天休居臬橋葬橫山

林槩字叔平本長樂人徙居吳有子六人曰希字子
中旦字次中邵字才中穎字傳中相繼俱登科其二

蚤卒希為知樞密院事謚文節旦為殿中侍御史邵
為顯謨閣直學士謚正肅穎為光祿卿希之子虞中
詞科旦之子虞亦登第有文行邵之子攄賜出身為
中書侍郎近世儒門之盛必推林氏云

王仲言聞之陳齊之云林叔平仁宗朝老儒也四
子希旦邵穎早擅克家之業叔平歿時有二子尚
在襁褓未名既長兩兄乃析其名示不忘父訓曰
希曰旦曰邵曰穎後皆為聞人號衣冠名族

葉少蘊云今言平江府為吳下灌嬰傳云渡江破吳

郡長吳下吳郡蓋平江府也下槩言之猶稷言稷下
教倉言教下爾

潘勺字叔治登第為吳興都掾後絕意祿仕遍游天
下佳山水有鴈蕩百詠自號癸甲先生或問其故曰
終始之義也後果以癸日卒甲日殮
葉少蘊又云吾鄉有老儒方惟深者字子通能詩嘗
為王荆公所知用意精苦所居陋巷終日閉門遇有
詩思即又閉其室步行其中引手瞋目若與人語或
空中搏拏跳躍故里人戲之為方捉鬼子通嘗徑造

一園亭不遇主人自監薄終日因題詩壁間云何年
突兀亭前石昔日何人種松柏乘興閑來就榻眠一
枕清風君莫惜城西今古陽山色城中誰有千年宅
往來何必見主人主人自是亭中客其灑落如此釋
仲殊一日訪子通留詩云多年不見玉川翁今日相
逢小榭東依舊青氈無長物只餘松檜養秋風可見
其清簡矣

陳長方字齊之其先長樂人父侁字復之娶林大卿
旦之女大雲翁處之妹與陳瑩中交甚密瑩中謫廣

中廉州侁以書賀之至千餘言由此得罪又嘗從游定夫深得治氣養心行已接物之要故其子亦為道學之士齊之因外家居於步里終日閉戶研窮經史號唯室先生有步里客談漢唐論行於世其弟少方字同之亦端慧不群號二陳云

章氏本建安人郇公之裔徙居於吳者有二族子厚丞相家州南質夫樞密家州北兩第屹然輪奐相望為一州之甲吳人號南北章以別之

吳郡城北五六里有一大冢在官塘之西相傳為唐

相陸宣公墓故其地名陸墓水名陸塘淳熙間有子墓傍得遺刻與所傳合郡人周虎張震發皆紀其事或者謂公雖郡人生於嘉興自貶忠州別駕薨於忠州其喪不曾還吳嘉興寶華寺乃公故宅按忠州圖經陸宣公墓在玉虛觀南三十步豈公嘗藁葬于此或又謂公已歸葬而忠州特虛冢爾

郡治之東有和令坊今名槐樹巷或以為楊和王存中所居而然非也按圖經在唐季已有此名紹興初楊始籍為園垂三十年楊方進封和國事雖偶合亦

先兆也

史發運宅在帶城橋淳熙初宅成計其費一百五十萬緡一傳不能保僦直十萬緡久不售後為丁季卿以一萬五千緡得之紹定末丁又不能保趙汝樞來為浙西提刑官占為百萬倉和糴場故老說發運初回時舳舻相銜凡舟自葑門直接至其宅前用發運司按紙黏窓鬻黏麵六七石自後僅易目前耳萬卷堂環列書四十二厨寫本居多始則論斤賣為故紙其後勢家每厨止得一十千席卷而去

范雲字伯達在太學嘗試禹稷顏回同道論學官見之以為奇作置之魁選遂馳譽京師學者至今以為模範入館除秘書郎成象成大即其子也

郭氏本郡中一小民所謂林酒仙者每至其家必解衣以醉之酒仙遷化前數日語郭氏曰疇昔荷相接之勤以藥一杯為報郭氏以味惡頗難之力強之飲三呷而止酒仙自舉而盡遂授以朱砂圓方曰惜乎富及三世爾郭氏竟售此藥四方爭求買之自此家大富三世之後絕無有售之者

張震發字元龍郡人嘉定七年袁省榜下進士廷傑

漢卿之曾孫

孫仲益守郡日戶口已四十三萬熈高居士虞廷臣書

徐稚山侍郎有妹能詩大不類婦人女子所為其詩

冲澹蕭然出俗自成一家

姚濟字子齊郡人淳熙二年進士

張字季安

陳少皋字舜卿

朱冲微時常以賣藥為業後其家稍温易為藥肆生

理日益進以行不檢兩受徒刑既擁資交結權要然亦能以濟人為心每春夏之交則出錢米藥物募醫官數人巡門問貧者之疾從而賙之又多買敝衣擇市嫗之善縫紉者製衲衣數百當大寒雪盡以給凍者其子勔因賂中貴人以花石得幸時、進奉不絕謂之花石綱凡林園亭館以至墳墓間所有一花一木奇恠者悉用黃紙封識不問其家徑取之浙人畏之如帛花石綱經從之地巡尉護送遇橋梁則撤以通舟雖以數千緡為之者亦毀之不惜初江淮發運

司於真揚楚泗有轉般倉綱運軍各據地分不相交
越畝既進花石遂撥新裝運船充御前綱以載之而
以舊者載糧運直達京師而轉般倉遂廢糧運由此
不繼禁御衛至于乏食朝廷亦不之問也畝之寵日
盛父子俱建節鉞即居第建雙節堂又畫徽宗御容
置之一殿中監司郡守必就此朝朔望畝嘗預宴徽
宗親握其臂與語畝遂以黃帛纏之與人揖不舉此
臂弟姪數人皆結姻帝族黃緣得至顯官者甚衆畝
有園極廣植牡丹數千本花時以繒綵為幙纒覆其

上每花飾金為牌標其名如是者里所凡園夫畦子
藝精種植及能疊石為山者朝釋負擔而暮紆金紫
如是者不可勝數計園中有水閣作九曲路以入春
時縱婦女遊賞有迷其道者冲設酒食邀之或遺以
簪珥之屬人皆惡其醜行一日畝敗檢估其家貲有
黃發勾者素與畝不協既被旨黎明造其室家人婦
女盡驅之出雖閭巷小民之家無敢容納不數日已
墟其園所謂牡丹者皆折以為薪每一花牌估直三
錢畝誅又竄其家於海島前日之受誥身者盡禿之

當時有謔詞云、朱勛之葬其父盛飾一女奴一童以殉之童奴不知其死也忻、然從柩而入壙靖康末大飢郡人怨盡入骨劫其壙而碎其骨初入壙門見骸骨二具猶志之曰此僮奴也

秦檜妻之弟王喚字顯道紹興初知府事峻于聚斂酷于用刑然其規為亦有可取者兵火之餘故墟瓦礫山積乃錄入城小舟出必載瓦礫以培塘人以為便石之破碎者積而焚之以泥官舍不賦于民而用有餘覺報寺其私家祠也黃堂前鎔錢鑄大士像而

人不敢言每刺鹿血置熱酒中飲之以求補益未幾疽發于肋脅而死

葉少蘊云吳人俚語若等人易得久瞋人易得醜雖鄙亦甚有理

徐敦立言往歲吳中多詩僧其名往、見於前輩文集中余渡江之初猶見有規者頗以詩知名其為人性坦率其徒謂之規方外時年七十餘矣談論蕭散可喜臨終前數日有詩曰讀書已覺眉稜重就枕方欣骨節和睡起不知天早晚西窓殘月已無多葉

左丞大愛之

潘允字悅之吳人仕徽宗為侍從宣和初奉祠居里中時郡民朱勔以倖進寵眷無比父冲殂勔護喪歸葬鄉里傾城出迎迓而潘獨不往潘之先塋適有山林形勢近冲新阡勔欲得之乃脩敬于潘、杜門不納勔恃恩自恣遣人諷之且藉以熏天之勢潘一切拒之勔歸京師果愬于上降御筆奪之已而又誅御史誣之以罪而褫潘之職雖抑之于一時而吳人至今稱之

龔敷頤字養正和州人兵部侍郎原之曾孫居于郡中有史學念元祐諸臣及建中靖國上書等人多表表立名節經崇寧禁錮靖康流離子孫不能盡存平生施為漫不可攷慨然屬意求訪闕遺遂成列傳譜述一百卷凡名在兩籍三百九人而書于編者三百五人而不知詳者四人而已淳熙七年周益公必大修國史薦之得旨給札繕寫以進後七年洪景盧以翰林學士領史事復薦之得上州文學邾僑字喬年元豐中人有幼學警悟

章康字季思其先康州人中徙浦城後因高祖葬吳
遂為郡人焉祖父皆隱約不仕季思嘗問學于朱文
公隱居白屋出入徒步人稱之曰聘君貴之也平生
足跡未嘗越州境而四方之人無有不知章季思者
士大夫過吳以不見為愧其為人慕向如此作詩至
多遇紙即書、成人又取去以此樂終身不厭年七
十八以疾終于家將卒時其正寢梁木折壞有聲人
皆異之郡人胡淳從季思學歲時致醪醴薪米其卒
也又代二子書世出內壙中淳字以初

姑蘇李璋敏于戲調偶赴隣人小集主人者雖富而
素鄙會次適李坐其旁既進食璋視主人之前煎圭
魚特大于衆客璋即謂主人曰璋與主人俱蘇人也
每見人書蘇字不同其魚不知合在左邊是合在右
邊是主人曰古人作字不拘一體移易從便也璋即
引手取主人之魚示衆曰領主人指揮今日左邊之
魚亦合從便權移過右邊如何一坐輟飯而笑有一
故相遠派至姑蘇嘗題遊處壁曰大丞相再從姪某
嘗遊璋題旁曰混元皇帝三十七代孫李璋繼至

吳俗好花與洛中不異其土地亦宜花古稱長洲茂苑以苑目之蓋有由矣吳中花木不可殫述而獨牡丹芍藥為好尚之最而牡丹尤貴重焉舊寓居諸王皆種花往、零替花亦如之今之盛者唯藍叔成提刑家最好事有花三千株號萬花堂嘗移得洛中名品數種如玉盃白景雲紅瑞雲紅勝雲紅間金紅之類多以遊宦不能愛護輒死今惟勝雲紅在其次林得之知府家有花千株胡長文給事成居仁太尉吳謙之待制家種花亦不下林下史志道發運家亦有

五百株如畢推官希文章承務俊心之屬多則數百株少亦不下一二百株習以成風矣至穀雨為花開之候置酒招賓就壇多以小青蓋或青幕覆之以障風日父老猶能言未經兵火以前有花之家置酒饌合樂工以待賞花者不問親疎謂之看花局今之風俗雖不如舊然大槩賞花則為賓客之集矣方臘之起郡中令保甲巡護雖士流亦不免范無外率府學諸生冠帶夜行用大燈籠書一絕句於上曰自古輕儒孰若秦山河社稷付他人如今重士如周

室忍使諸生作夜巡太守聞之亟為罷去盛章作守頗嫚士范因元夕府會作寶鼎現詞投之極蒙嘉獎遺以酒五百罇其詞至今傳播云

袁鰲字可久崑山人紹興十二年進士有文齋雅記子宗仁中世科

甫里白蓮花寺乃陸魯望舍宅為之後所有祠堂貌像蓋當時物咸淳間有盛氏子醉遊寺中因仆其像于水中則滿腹皆其平生詩文親藁也寺僧訟于郡時郡守倪普深怒之遂從徒坐而更塑其像雖足少

雪天隨之辱然無復昔時之腹藁矣

黃子由尚書之夫人胡元功尚書之女也後敏強記經史諸書略能成誦善筆札時作詩文亦可觀於琴奕寫竹等藝尤精自號蕙齋居士時人比之李易安云

范文穆公成大晚歲卜築于郡之盤門外十里蓋因闔閭所築越來溪之故基隨地勢高下而為亭榭所植多名花而梅尤盛別築農圃堂對楞伽山臨石湖所謂姑蘇臺前後相距亦止半里爾孝宗嘗御書石

湖二大字以賜之公作上梁文所謂吳波萬頃偶維
風雨之舟越戍千年因築湖山之觀者是也又有北
山堂千巘觀天鏡閣壽櫟堂他亭宇尚多一時勝士
咏賦無不極鋪張之美乾道壬辰三月上巳周益公
必大以春官去國適吳公招飲圃中夜分題壁間云
吳臺越壘距門才十里而陸沉于荒煙野草者千七
百年紫薇舍人始創別墅登臨要甲于東南豈鴟夷
成功于此扁舟去之天闕絕景須苗裔之賢者然後
享其樂耶公為之擊節而前後所題盡廢矣

黃端冕家有白鹿巘梅溪鹿苑臺銘記云維定武六
年八月日銘記大晉永和七年歲在辛亥三月十九
日平原內史陸機再建立華陽真逸書字畫蓋王逸
少書端冕以為視此刻則瘞鶴銘為右軍書無疑矣
端冕名纓其先建安人居光福山中父策直秘閣宣
和末屢上書言事李丞相綱為行營使嘗居幕府遭
亂還鄉端冕紹興初有文名其後有名簡字元易者
博學強記善談吐能為詩文樂府所著有東浦集雲
墅談雋端冕之弟黃司理緯字師文善醫有奇中喻

子才其妹之夫也

費補之云近見蘇子美墨跡一卷皆自書其所作詩
行草爛然龍蛇飛動其中有獨酌詩云一酌澆腸俗
慮奔鷄微鵬大豈堪論楚靈當日能知此肯入滄江
作旅魂卷尾題云慶曆乙酉十月書于姑蘇驛舍攷
其時蓋是被罪之明年居滄浪時所書其詩語放曠
如此或謂其流落幽憂以終非也

清源莊季裕云建炎三年寓長洲縣彭華鄉高景山
北白馬澗張氏舍時山上設烽火夕舉以報平安留

月餘即過浙東臨行書一絕于壁間云昔年隨牒佐
邊侯愁望長安向戍樓今日衰顏來澤國又看烽火
照長洲是冬金人犯杭城明年春由平江以歸白馬
澗去城十八里數宅百餘區盡被焚毀獨留余所居
于壁邊題耿先生到此不燒七字

畢良史字少董一字伯瑞東平人丞相文簡公五世
孫風度凝遠少遊京師四舉禮部不中出入貴人之
間遭亂南渡僑居興國軍江西漕蔣璨喜其鑒辨博
洽資給令赴行在遂以博古說動諸內侍內侍皆喜

之上方搜訪古器書畫之屬恨未有辨其真偽者得
良史甚悅月給餐錢五十千仍令內侍延請為門客
又得束脩百餘千而食客滿門隨有輒盡用族人恩
澤補上州文學紹興 年為東京留守屬官權知東
明縣東京再陷即罷從事留虜中三年著春秋正詞
論語探古有宋城哲夫李師徵願良執經師之宋執
一卷書背立且讀且指李執一卷書向其師若有問
者良史坐一榻上後有二女奴各有所執而阿冬者
坐其間良史之季子也女奴之髻者曰孫壽冠者曰

馬惠真好事者寫為繡經圖陷北境時嘗褐衣走間
道即以蠟書上之泗上繼好勅蕭誼以歸、日進所
著書改秩升朝後以直敷文閣知盱眙軍以卒子希
文希旦今子孫多居吳中云

潘夢旂字天錫郡人慶元二年鄒應龍榜進士及第
所著有漢兵編夷堅三志一事

程泳之沂伊川先生之孫知崑山縣秩滿其弟鉅為
府監倉乃携其家就居焉

王陔字希武叅知政事絢之子有第宅在崑山

紹興三年癸丑八月五日長洲縣地震自西北方來
樹林皆搖蕩父老云元祐九年九月廿一日嘗如此
又紹興十三年癸亥三月十五日清明大雪盈尺
郡人潘擇可崇寧五年以舍法貢入京未至夜夢衣
褐挽車三十輜其弟端夫衣綠隨其後政和三年擇
可以上舍釋褐後三十年端夫始就恩科乃悟挽車
三十輜者三十載也

孫价字元善居郡中其子紹遠字稽仲提舉福建常
平紹祖字文仲俱有文學政事

錢侯字維大郡人趙達榜進士及第嘗任著作郎將
作少監

李益字彥中郡人嘉玉榜上舍出身

魏志字幾道郡人紹興四年進士

盧彥仁龍圖閣直學士秉之孫

姑蘇雍熙寺每月夜向半常有婦人往來廊廡間歌
小詞且哭且嘆聞者就之輒不見其詞云滿目江山
憶舊遊汀州花草弄春柔長亭艤住木蘭舟好夢易
隨流水去芳心空逐曉雲愁行人莫上望京樓好事

者錄藏之慕容崑卿見而驚曰此余亡妻所為外人
無知者君何從得之客告之故崑卿悲歎曰此寺蓋
其旅櫬所在也 竹坡詩話
魏鑄紹興間人善書學虞世南孔子廟記太和宮碑
是其跡

麋師旦字周卿吳人紹興戊辰登科紹熙庚戌為江
東轉運主管官蜀相士楊生謂于相法當有肉峰生
頂上愈壯則愈顯後果有肉隆然癸丑歲為嘉禾守
楊復訪之則峰益高麋嘗歷御史主簿祕書郎春秋

幾七十年矣然纔至左司郎中卒于乙卯夷堅志

吳仁傑字斗南其先洛陽人居吳中父信舉進士至
國子學錄弟仁輔字子樗

陸知微吳人靖康中為開封尉氏丞

陸燾

林璞字伯振弟琰字玉珪乾道五年同登進士第琰
善篆

王曉字俊明

何蓑衣猷道僧二事見夷堅辛志

熙寧己未歲夏秋之交天久不雨所在苦旱吳郡醮
祭踰月不效通判趙師禹憂見于色適有寓客林通
判光祖自少奉道得法於路真官有起龍致雨符其
應如響趙具詞瀝懇于林、為飛牘奏三境上言檄
告水府令其子永壽偕趙客陳擇賫往林屋洞投之
洞蓋太湖龍窟土民云欲雨時則洞口出雲如饋餽兩
人涉巨浸抵靈佑觀集道流具香几詣洞焚檄竟褰
裳以入其前嘉木一本童、若幢云云辛志
郡城北數里有古石幢唐徐浩書太守陳師錫徙置

府第鄉人夜過河上者多見鬼物乃相與請于州復
置舊處其恠遂絕

至和中樂安公守姑蘇日虎丘厓下水涌得竹簡數
十小片皆朱書有孝建年號蓋宋武時紀年也蔣穎
叔自記于手藁其孫世昌錄收之

和靖尹先生去經筵寓虎丘西菴榜曰三畏齋嘉定
初丁焞晦父通守吳郡乃建祠堂于其後

范文正公興鄉郡首建學聘安定胡先生條立學規
講堂照壁猶是當時故物元統二年劉漢臣者為教

授乃拆以造其女奩具未幾失火獨然其廬而文正公之祠巍然無恙

樂備字功成本淮海人寓居崑山以文學名于時登紹興廿四年進士第仕至軍器監簿

顏度字魯子究國公五十三世孫由唐魯公之孫子仕常熟遂為吳人舉進士以文章政事名一時仕至工部侍郎孝宗謂度每出一言不動如山弟應字子

循子叔脩字

叔平字景晏從子玠字景珪叔

瑜字粹中叔剛字

皆擢高第玠升字容玠璵

字器之特奏名其子孫皆居真慶坊

顏直之字方升世為郡之長洲人生而端厚穎悟異嘗好讀書靡不涉獵以弓矢應格差監省 即丐祠

養親主管建昌軍仙都觀自號樂閑居士作退靜齋


婆娑其間幅巾危坐然香撫琴意泊如也平生好施

與尤樂以藥石濟人疾苦賴以全活者甚眾備物致

用率以智創輒出人意表工小篆得詛楚筆意嘗與

叅政樓公鑰書攻媿齋榜媿字采之齊侯鏞樓公喜

以為與己意合賦詩美之所著有集古篆韻二十卷



瘍醫方論外科會海瘍醫本草等書公氣貌豐碩善攝生不邇聲色而年止五十一以嘉定十五年五月甲寅卒墓在吳縣至德鄉雅宜山子汝霖汝礪汝勛汝勛字元老有清行少傳趙師貢以郊恩奏得官主温州永嘉簿江陰軍錄事叅兩浙轉運司帳管改官主管文字知和州含山縣監左藏西庫辟淮東安撫司機宜文字通判滁常二州慶元府俱不赴奉祠雲臺觀官至朝散大夫至元廿八年八月四日卒年八十七

陸友字友仁姑蘇人姑蘇為東南都會富庶甲於天下其列肆大賈皆靡衣甘食其子弟自幼讀書稍能執筆識姓名即教為商賈事以故文學日少友仁生市廛闐闐之所父以市布為業獨能異其所好攻苦於學鄰里多竊笑之雖其父亦不樂其子之習儒也及長益親賢士大夫往來其家鄰里雖有大姓賢士大夫不入也于是隣皆自媿欲教其子以陸君為法君善為歌詩長於唐人五言律工漢八分隸楷又博極群物時海內治平富家巨

室爭以古器物相尚凡三代以下鍾鼎銘刻漢唐
以來法書名畫皆從陸君鑒定真贋一經品題價
遂十倍嘗觀光上國奎章閣鑒書博士柯公九思
一見服其精識而侍書學士虞公集亦善其書遂
相與言於文宗皇帝未及仕用而二公去職君內
顧無知己乃與柯公南歸吳闢小室僅可容足膝
中庭植翠竹數竿旁樹湖石峰巒秀異室中左右
圖書集古今雜錄前列几置天祿避邪紫鳳池金
銅鎮紙皆可愛玩客至出博山爇古龍涎汲虎丘

劍池水煮建溪小鳳團清坐竟日自號研北生著
研史墨史得衛青古玉印并著印史翰林諸賢皆
賦詩詠之所為詩文有杞鞠軒藁年四十八以疾
卒

論曰大小二篆變為八分漢世多用之而秦隸人
之書未行也晉王右軍善隸書而八分之法隱學
者罕習焉唐所傳者唐韓擇木蔡有鄰李潮而今
觀其書去漢遠甚近世洛陽楊友直蜀郡虞伯生
大梁趙子期吳彥輝京兆杜伯原皆著名當代而

所尚不同君獨追蹤石經欲與蔡中郎鍾太傅相
上下可謂成于藝矣杜公嘗與予書杜子美詩一
章方正嚴重如通經巨儒進止有法君見亦為予
書八分小篆歌如昆刀切玉不見形蹟而剛勁之
風溫潤之質望之儼然今二書亡失而君不可復
見故論著之以慰懷思云爾

余嘗見陸友仁書吳中舊事一卷於

衡山先生几上後數年過蒼雪館見已裝帙且
用松雪翁印之遂假歸亦錄一冊仍繫徐顯

克昭所著稗史雜錄友仁小傳于後以見非松
雪翁筆也隆慶改元丁卯四月安雅生顧德育
記昔年六十又五

